


新鄭縣志

733  
1763  
1774  
1776  
1777

V. 11









新鄭縣志卷之二十九

金石志

金石文字可以正經史之譌而補其亡闕六一居士嘗癖此以爲厥功甚大作集古錄趙德甫繼之志之載金石則自漁仲氏始而郡邑尠聞焉新鄭介汴洛間多故家遺俗且唐宋卿大夫多瘞於此風摧雨蝕之餘往往于荒烟蔓艸間得殘碑斷碣然漸爲牧豎磨礱不可辨識更數十年不幾盡化爲無字碑乎予甚惜之爰屬諸同志竭力蒐討得若干章卽字跡漫漶亦備錄焉其間有欵識可記者並載之若文字完好仍歸入藝文志不贅見也編成弁以鼎尊二銘庶不虛金石之義後之作集古錄



者當必取徵于此矣作金石志

鄭成公鼎銘 銘二百三字見宣和博古圖圖作秦穆公非故錄其

原文而著其辨于後

成曰不顯走皇祖穆公克夾釁先王曰左方穆成公亦闕一歷望

一闕一皇考幽大叔繼闕一命成允缺一祖考政于邢邦弘缺一

大闕二賜朕般右作命臣工哀哉用天降亦喪于上或亦惟器屋

黜方率南缺一節東缺一廣缺一南域東域至于歷寒王缺一命

廼六呂攷八呂曰冕成共侯缺一方缺一眉壽子右缺一客欲

匡每克我缺一爵武公廼缺一我率公朱軒百棗缺一百徒缺一

作王缺一肅缺一皇揚六呂缺一八呂缺一侯缺一勿缺一壽



率雱缺一字以缺一字已缺二字至于訛京我缺四字定缺一字方缺一字成

缺六字也用作入寶缺二字其萬萬子子孫孫缺一字寶用

右鄭成公鼎銘也宣和博古圖錄作秦穆公鼎其錄云考秦世  
次先武公次成公而穆公又其次之銘復先穆公次言成公後  
言武公質諸經傳莫不有意義雖詩曰既右烈考亦右文母蓋  
自烈考以上逮於文母也而此鼎之文世次亦有所法予謂銘  
者書之流別也天子令德諸侯計功夫稱伐其辭雖不同而  
意則一也圖中所載古鼎銘甚多按之俱不類今定以爲鄭鼎  
于義始合考史記鄭世家武公克虢鄆之地而居於鄭數傳至  
穆公其子靈公靈卒庶弟襄公立襄卒子悼公立悼卒弟成公



立是穆公爲成公之祖故云皇祖穆公也若以爲秦則成公在穆公之前銘有云成曰則是成公之言矣豈得曰皇祖穆公乎哉銘又云政于邢邢許慎說文鄭地有邢邑銘又云至于口京賈逵曰京鄭都邑杜預曰滎陽京縣京邢皆鄭地不得爲秦則可知其言武公者蓋以其爲新鄭之所始故特言之爾不一作不曰不顯走者詩言有走不顯走者如太史公牛馬走蓋自卑之稱也特識之以俟博雅者攷訂焉

鄭高克尊銘

銘五十八字見考古圖原文見後

唯十有六年十月旣生霸乙未伯太師錫伯克僕山夫伯克敢對揚天佑王伯友用作朕穆考後仲尊高克用丐眉壽無彊克克其



子子孫孫永保用享

按左傳閔公二年鄭人惡高克使帥師次於河上久而不召師潰而歸高克奔陳鄭人爲之賦清人則是噐蓋鄭物也考古圖作衛非霸玉篇今作魄顏師古曰與魄同

東魏造佛像碑 碑在三堂寺上下皆刻佛像中截刻文每行六字

共十八行原文見後

大魏武定元年歲次癸亥二月癸酉朔三日合等敬造石像壹區夫靈元凝湛唯佛現會真容紺畫經像訓世然今此下道俗等故能異人同契敬造石像壹區上爲皇家祚隆萬代中爲師僧父母

下爲邊地衆生

缺二字

除行脩果

缺三字

時見性

下缺



魏崔府君墓誌篆蓋 石在時家莊觀音堂篆刻魏金紫光祿大夫

陶城郡守崔府君墓誌十六字文亡

按篆蓋止言魏而文已亡不知曹魏元魏考魏書官氏志三品

曰尹曰刺史加秩則金紫光祿大夫其爲元魏無疑故附此

妙法蓮華經石幢 幢在卧佛寺山門內東二百爲風雨剝蝕餘四

面可辨字體甚古未知何代人書其風格總在唐以前故附此

北齊造佛像碑 碑在三堂寺牆上上截刻文下截刻人名多不可

辨原文見後

大齊天保九年歲次戊寅四月戊午朔廿

闕五

中己未大覺冲筆

幽神元廓非積都唯

缺一

何以

缺一

其蹤

缺一

因

缺一

以唯卽觀



其缺二以缺四萬之唯邨音道樹缺七蔭唯邨合缺十乘缺三之

字缺三唯邨缺四述之遵是缺五魯山玉寺缺一近缺四福缺二皆

捨家缺二敬造七級浮圖一缺一區中有缺一面大龍缺一像缺三

字高大缺一文龍缺一轉石其上缺二尊禮於其下金缺一在缺七

字十姓缺一具在其上置之缺一之可缺二記之於是看者盈門

字缺二揆缺四念者救危度缺三之缺五也缺二來因賓缺十哉

北齊造佛像碑 碑在觀音寺石裂爲五正面鐫諸菩提像及四比

邱名製甚精巧陰防文凡五百五字微作隸體盖當時書法猶有

漢魏間遺意云原文見後

比邱惠常 比邱尼惠方



比邱寮幼

比邱道先

維大齊河清三季歲次甲申四月己丑朔十三<sup>乙</sup>庚子敬造若夫至  
理元寂非言無以詮其景行道宗沖邃匪功何以表其盛德至迺擾  
擾四生皆出入於存亡之境駟駟萬人僉去來於是非之路幻術雖  
形駭電已滅輪迴不息循環豈已非建宏業意奉靈津昏蔽之鄣誰  
滅明達之旨焉致然有北豫州州都白水王府行暴軍兼別駕毛叉  
擢本八桂之藪抽芳鄧林之苑播才俊於陞府藉地厚於嚮家識惠  
清遠人爲水鏡器量邀濟才實通理苦空無我便損七尺之軀緣假  
非有不恡千金之貨仍育比邱僧道政德行淹闊食素修顯洗心法  
水構情道際共相經紀出入存功遂率邑義州人等選自福田瞻言



勝地在垣堦寺於敬造石像一區石採嵩華匠追楊鄴現絕倫妙  
盡其容止佩鄭邑見桓武之舊事南面形山瞰田廛之舊業宅帶二  
水乃延智者之居右瞻三山仍屬仁者之宅千載百世其邑同榮葉  
弊陰連少知星月流遁之客得道入門負笈之夫陟遊忘返赤門俟  
德器令是歸荷錫名僧豈遠千里戒行清苦必存十善之誠言念至  
誠詎違六時之道馴馴恂恂邕邕穆穆真有鹿苑之風不無鳥山之  
誨敬羨嘉處建茲功德其詢曰無小無大慕想伊輔誰能達盡盡  
爲非詰人明識惠此法機濟時以道拯手留玄苦海揚波火宅炎盛  
多途汲引昇此究竟返迷得術偈我明命禪感不休功興已竟道生  
四諦業起三門白鷺致苦烏鴉與恩露遙宏烈敢庶斯存鐫石功紀



固本深根理尚冲寂道貴清素絕塵自此和光匪處崔嵬高山浮邱  
已過潺湲流水濯澗是趨

北齊佛座題名記

碑在石洞寺佛像座下其月作月日作◎者古

文也原文見後

大齊武平五年歲在午二月辛卯朔廿◎庚戌丁思遠敬造石像

一區

唐佛頂尊勝陀羅尼經幢

幢在卧佛寺浮圖北永淳二年建立上

大書上爲開元神武皇帝八字經行書

唐墓誌磚

乾隆元年五月六日郭店西北半里許兩過溝岸摧有

古磚見上書一百九十八字原文見後



維大唐開元十一年歲次癸亥四月乙未朔二日景由鄭州新鄭縣萬歲鄉萬歲里博陵郡神時極殯在鄭州管城縣馬亭鄉華城里朱劉村西北一里半東西掘溝北坡李素地內安置又東南去郭店二里西南去

飲

唐辛府君墓誌 不在捕章山東乾隆三十八年出土爲民家移作

擣衣砧故字多疑與原文見後

大唐故右衛將軍吏部常選辛府君墓誌

并序

胙土開家義光於夏典因封得姓道煥於莘墟暨後金玉相輝忠良遞襲歷周秦而頻繁經漢魏而不渝所謂寵祿不朽代濟其光公侯子孫實在是矣公諱景祚字景祚其先隴西人也曾祖昭後



魏魯陽太守有隨外黃太守軾熊席以鎮俗乘烏旗而警務祖福

唐汝州襄城滑州白馬二縣令考元覽唐萊州膠水

缺一字

州宋城

二縣令胥字人以簡御黥有方道異飛是才同繫驥公起家右衛

勳衛吏部常選林泉縱心詩酒自怡耻州縣之徒勞不乾沒於名

利湛黃

缺三字

頃聳嵒松於千仞豈期及不駐側景難留與善無

徵纖良奄及以開元七年二月八日終於青州蓋

缺一字

夫人隴西

李氏柔明成性道殉張箴婉順居恒義符

缺一字

誠以神龍元年正

月十五日終於私第嗚呼生死雙相離

缺一字

於魏并飛沉兩

共沒於吳江後夫人昌黎韓氏粵以天寶七載十一月十三日合

葬於滎陽郡新鄭縣幽勝鄉之原禮也嗣子庭芳等扣厚地而傾



缺五  
落蔭旌素行以紀德刊元石以貞信乃爲銘曰

仁本在禮缺一在乎孝生事靡嘗死事不撓恭缺三人存於教崇

於典缺一榮其宅兆是美是德克光克缺

唐修公孫僑廟碑 碑在祠中天寶七載建隸書

按明于奕正金石志云新鄭縣有唐天寶中修公孫僑廟碑舊志載康熙三年邑令謝鴻奇重建祠宇記末云祠興於唐天寶七載歲戊子專知官朝議郎行令嚴宙及判官宣德郎行尉王季復奉招討使某公所建云云又黃叔璚中州金石考云碑石斷裂可辨者一百十四字今此碑已亡僅存牆角片石十數字而已蓋此碑于明時尚存謝令時猶可辨數百字至黃公作者



時已亡其半今相去又四十年字蹟所存如此更後數年其可復問乎予又于友人家見舊搨本雖不可句讀然中有天寶七載五月十三日及專知判官宣德郎百餘字其落款處有元皓敬三字書法在韓擇木梁升卿之間惜不得其全爲可惜也

唐滁州刺史滎陽鄭公墓誌銘 中州金石考云白居易撰

按長慶集云元和二年遷葬於鄭州新鄭縣某原附先秘書之塋

宋志古堂記 中州金石考云尹洙撰碑舊在縣署今亡文載藝文志

宋封秦國陳公碑銘 碑在墓南二百餘步高二丈許濶八尺凡二



千四百九十一字內缺五百二十七字原文見後

大宋故中散大夫左諫議大夫輕車都尉臨潁縣開國男食邑三百戶賜紫金魚袋累贈開府儀同三司太師尚書令兼中書

令追封秦國公

陳字 碑銘 并缺

朝散大夫尚書兵部郎中知制誥同勾當三班院上輕車都

尉賜紫金魚袋王舉正撰

朝散大夫行尚書膳部員外郎知國子監書學兼判吏部南

曹輕車都尉周越書并篆額

夫雲上于天霈甘澤而潤下士志於道藹餘慶而昌後若乃嚮用五福浚明三德輝光炳大畜之旨博厚服中庸之訓亘代作範詒



謀俾肖缺五君缺四公諱省華字善則其先潁川人嫺滿受封權

輿胙姓隱耀儲祉才英間出紛綸卓犖薰灼方曾王父諱翔唐

末補并門記室王建守益部缺二幕下時建恃險缺六記缺一諷

以大義建不能用投劾謝缺一遂為缺一王父諱詡仕蜀為遣運

使嚴考諱昭汶抗志遯俗林卧家食奕世令德茲焉發祥累贈俱

躋極品公十三而孤端誠力學奮節不倚缺五聞其名召為鳳州

西水缺三無所遂委質焉嘗濟夾江始及中流缺六舟覆缺一公

伏于馬上與之沉浮觀者駭焉謂之必溺俄有漁者飛楫而拯因

而獲全識者謂非有德者乃無生矣陰護幽贊孰知其然異時昌

大詎可知也缺一以缺一得而為行益敏缺一之道吾知之矣且



不缺五白他有耀予缺一行矣會鉅宋開國為

侯駕而首觀關下初命秦州隴城簿累改京兆府檢陽令

沃為邑膏雨惠久而吏蠶政慢而缺六政利缺四益缺六公一心

農疇勸力渠事且令缺四日缺一寔民缺一金之斂歲輪强家非

所以為銅墾之大夫也必將爭之不勝不止彼營營之飛信信之

聲祇益其咎爾胡足畏也鄰壤違公之言缺一公之心缺八復乃

滲漉之潤缺四之稼缺食邦賦充衍不墮人到於今缺四里之

俗尚乎晚葬父母昆弟率從槨瘞木已拱矣視之恬然公職化長

人思有以勸乃謂民猶水也繫夫所導孔子曰缺四事缺一從周

盖美夫送終之禮具缺四草葬缺一霜露誨之自我能無缺四



之氓以感以泣悉曰使往者有歸缺三 魄陳公之心仁於我也厚

矣相與周急勉奉其事未期月而葬者過半逮公改邑僅無遺矣

公乃曰謂民無知不亦欺乎缺三 從憲缺一 樓頌令時長子堯叟

缺一 進士缺二 登第缺十 氣磊落太宗時試深所屬目因詢其家

世輔臣素知公之才德遽以名對上曰見其子知其父矣擢太子

中缺一 制曰且欲勸天下之缺一 人父者缺九 鹽鐵判官遷殿中

丞錫缺六 為光祿丞缺一 屬東觀促召同賜拜前拜後薨襲簪紱

朝倫仰止儒苑增缺一 鄆州為東夏巨屏缺四 國家資東缺二 公

首其選而缺一 命焉澠河之邦分缺十 之缺三 防川缺一 禮義之

設所以牖民缺六 何從而畧焉始乎繕完終乃教化事靡缺一 素



人率蒙惠惟苟簡之弗任顧滅裂而何有就委京東轉運使至道

初越絕內饑蘇臺特甚如缺一 慘急之吏未恤傷瘼之缺一 詔還

賜三品缺七 而綏缺七 澤之區縣載不缺九 道確之苦裕人約已

茲可忽乎繇是炳忠厚之誠論輕情之俗明罰勅法舉其大畧情

恕理遣宥夫小過夷易煦嫗如熱斯濯治效著聞鹽札垂獎真廟

繼聖眷乃方面又進吏部移缺一 潭州長沙與區列郡都會控要

荒而作翰巨舳艫而瞻國啟廸孝悌之訓尊隆清淨之化精力匪

有矩度缺九 之缺七 判官以蠻微倣擾充缺七 任開封府推

官以章奏指切出潮州通判同氣二人咸處嶺外朝廷意公上言

親黨願公有請公曰兄之行也分招徠式缺九 直缺九 為缺六 祥



吾不為惡豈字缺十忱吾以此卜昭昭之鑒其食言乎後果嚴召俱

躋膺仕信已不惑有如是焉陟明授鴻臚少卿判南曹俄同判吏

部流內銓景德初知開封府字缺五尚威免公則不然字缺一以字缺四

處字缺一俾耻格而無犯謂馴致之字缺四轂之字缺二夏民或鈎距辨

智字缺一不能也上喜其然謂可大受就遷光祿卿時堯叟為樞密

使堯佐直史館堯咨知制誥腰金鳴玉蚤暮溫清字缺三光字缺二士

族公以久次之風望荷字缺一聖之器任寵深而字缺四而不後嘗字缺一

字謂郅曲乃字缺一支離者壽稽縱心而請老遂剡奏而還印上方

樂近耆德面詔敦諭特授左諫議大夫允解府綬俄鍾字缺六路北

狩字缺十復適循進退之度字缺二寒暑字缺一疾復三字缺四官字缺四慤



素未獲命可之報而乃宸翰中降示以圖任之意畧曰卿但

清心養氣勿弗過慮諒冀漸諸于康愈卽當別後于

倫缺二字久缺二字映厚方引退而決去豈苟缺四字願缺一字請缺二字

奏弗許命有司趣給如故旋又緘御藥而加賜走國醫而接踵密

誨臨撫曾無虛日公恭愿之度發于天性缺一字王人降缺一字必力

疾西向稽首缺三字命加服缺一字不爽臣禮迨乎寢劇中使旁缺一字

左右掖之而興缺一字能言但缺一字頤指若有所蘊家人弗曉乃復

之曰是不欲南面乎公領焉遂復西向自感疾至于屬續未始一

日忘其然也嗚呼缺一字如是主知如是體其缺一字心缺一字國事而

尚小天何不愁迫乃真數以景德三年缺一字未隕然委化啟手足



於東京安定坊之私第享年六十八

缺二字

皇上悼嘆追贈太子少

師法賙加等遣中貴人就第申弔復

缺三字

護塋皆非常例也以是

年七月二十七日歸

缺二字

鄭州新鄭縣臨洧鄉抱章山之側噫太

祖握符公卽被遇綢繆中外之任恒赫始終之節生榮歿顯世罔

偕者累贈開府儀同三司太師尚書令兼中書令秦國公

缺三字

氏

柔

缺十

以嚴以

缺一字

薦紳之談謂之孟母年八十

缺八

五歲終

缺一

字

封燕國太夫人子三人悉所長也列秀競爽高大閭閻堯叟仕

至樞密使戶部尚書同中書門下平章事出爲右僕射判河陽堯

佐仕至戶部侍郎同中書門下

缺三字

集賢

缺四字

出爲淮康軍節度

使同中書門下平章事

缺十

冠科級仕至翰林學士龍圖閣學士



工部侍郎知開封府出為武信軍節度使知大雄軍頃歲咸以雄

文偉學缺二太史通才敏識互尹京兆唯叔出季處之政缺一前

張後王缺六亦嘗蒞其任內史之選出於一門缺八第者凡八缺

十九人猶子堯封洎侄孫漸淵三榜復六百七十二人無不拜公

於丈人行也昔萬石之家舉集光寵荀氏之子並有名稱以今方

古彼或缺焉女五人長適缺一中缺三次適缺一州支使崔保緒

次適缺二外鄭缺一慶次適起居缺六次適度支中郎嚴誥孫一

十五人咸列仕籍誥誥雁行濟濟驚序章明似續取重軒冕今年

淮康缺一罷相府言鎮圍澤展視松楸之域緬懷金石之刻謂舉

正迹涉外姻耳目事實見託論誤以備邱谷大懼孤陋之作徒貽



質俚之誚

缺十五字

之旨也銘

缺一字

惟聖御天惟賢輔聖歿有令名是

曰流慶顯允陳公太邱之裔詩禮趨庭芝蘭生砌宰邑斯勤守土

惟仁銓管京兆衡平鑑新公嘗有言孔父之旨造次弗違

缺二字

而

已

缺八字

千載風雲一門龍虎有子維何曰將曰相有孫維何友直

友諒洪範五福皐陶三德公實兼之可頌可則既畢婚嫁乃營亭

榭世謂賢

缺一字

人推達者年未繼心

缺十字

臨洧之鄉抱章之坂南

望邢山如見子產二公爲臣憂國憂民豈曰世異今爲德鄰喬木

森森冥途陰陰賁乃真宅光茲孝心寶元二年歲次己卯八月庚

申朔中秋日甲戌建

宋陳文惠公自撰墓碑

碑濶四尺長倍之在墓前已仆枕于塚上



有字右畔微缺餘全楷書嚴正類魯公原文見後

有宋潁川生堯佐字希元道號知餘子壽八十二不爲天官一品  
不爲賤使相納祿不爲辱三者粗可歸息于秦國先令公燕國先  
太夫人元兄樞密相公棲神之域慶歷四年歲次甲申九月己未  
朔二十七日乙酉進士冀上之奉太師相公治命書于石

按宋史本傳亦載文惠公自誌其墓文僅壽八十二以下八句  
惟末句三者粗可歸息於父母棲神之域矣與石刻稍異蓋史  
節文爾東都事畧所載第一句生字之上有先字餘悉同至王  
圻稗史亦載此誌則曰年八十不爲天脫去二字末云歸息於  
先秦國六夫仲宣丞相棲神之域吾何恨哉與原文大異此又



傳說之譌當以石刻爲據也

宋陳文惠公神道碑 中州金石考云慶歷四年歐陽修撰碑亡文

載藝文志

宋鄭夫人石槨銘 中州金石考云歐陽修撰有石刻在新鄭縣今歐陽寺右百餘步有土塚微起前立此碑上刻鄭夫人墓銘五篆字下截埋土中未見槨銘從文集中錄出附後

維皇祐五年癸巳六月庚午匠作石槨粵七月己亥旣成

銘曰於乎有宋歐陽修母鄭夫人槨旣密旣堅惟億萬年其固其安

按歐陽公文集載爲其室胥夫人墓誌銘云從其姑塋于吉州



吉水縣沙溪之山則太夫人之不塋新鄭明矣細詳其文止言匠作石槨而未明言所塋歲月蓋當時止作此槨而未曾塋爾墓銘舉例復引此文云歐陽修有母鄭夫人石槨銘石槨有銘又一例也書作槨之日而系以銘又一例也

宋牒旌賢院石刻 石籍成臯寺屋牆上列銜皆大書下有押牒勅皆草書大字餘則否門下及年月處皆有印蓋當時原式也原文見後

中書門下牒旌賢崇梵院

右諫議大夫天章閣待制勾當三班院王子融奏臣亡兄曾於鄭州新鄭縣安塋墳側僧院已奉



勅賜號崇梵院欲乞依呂夷簡墳所僧院例每年撥放剃度行者并臣亡兄曾神道碑昨蒙

御篆賜名旌賢其崇梵院欲乞賜號旌賢崇梵院准勅旨牒奉

勅宜特賜旌

賢崇梵院爲額

每年乾元節與

剃度行者壹名牒至准

勅故牒

皇祐二年九月十三日牒



工部侍郎參知政事高

兵部侍郎平章事宋

吏部侍郎平章事文

大觀元年七月二十二日藝謹命工模勒上石

宋三賢堂贊

碑在成臯寺嘉祐四年劉敞原父撰原父碑作原浦

蓋其自書想不謬也明成化十三年僧可鑑重鐫原文見後

旌賢崇梵院三賢堂贊

并序

宋起居舍人知制誥

劉

敞

原浦

丞相沂公薨東里子產之墟而與裴晉公隣鄭人以三賢者之行已事上養人使民其終始同然則宜相近然爲之作祠堂合



而享之豈所謂尊德樂善緇衣之遺風也歟贊曰

賢不常出曠世而遇其猶旦暮如三公者或相一國或相天下善始令終高明有融盛德大功時之遠也千有餘歲若相長弟循迹揆心死而不亡孰有古今其像于此自鄭人始有來仰止嗚呼若登高山若浮深淵夫又孰測焉

嘉祐四年己亥重陽日緯書中書省玉冊官司馬銳刊

朱三賢堂記 石在成臯寺書法娟好內缺一字原文見後

鄭州新鄭縣旌賢崇梵院三賢堂記

資政殿大學士兼翰林

銓字

侍讀學士尚書戶部侍郎吳育撰

夫高賢令躅實當世而名後葉使千載之下想見其人瞻言存奉



如聞其聲茲如在其左右所感被深者其光靈遠也著於風謠思  
慕則召伯憩甘棠而勿翦形於山川氣象則牟公與岷首而俱傳  
豈止廟于家圖于台祭于鄉社苟可以明風迹而寄所慕亦何常  
哉宋故丞相沂國文正王公會逮事章聖皇帝朝登列輔今上卽  
位一執魁杓再提相筆又冠機廷明肅太后受遺輔政天下事參  
斷簾幄公議兩宮間當乾興天聖中據正持重不爲物搖勢若山  
嶽凡所以殿邦柅動躬密勿定危疑斥權邪正基本者非一言一  
事用是訖母儀之世朝廷中外維固謐然則公有力於國而陰賜  
在人多矣公薨塋新鄭臨洧鄉之原原側且有梵宇詔特改鄉名  
院榜皆曰旌賢爲公設也其地則鄭子產之東里其西北距公塋



逾千步又唐相晉公裴中立之墓在焉院僧惠璉以三賢之迹適  
會茲地乃建祠堂募工並繪其像于屋壁眉宇森映儼乎其生凜  
然清風隱若晤語遠近人士歲時有以瞻享瞻人無今昔異代相  
望道拂趣睽則比肩萬里德符心期則窮古一期若將三賢神交  
于此亦雅俗之嘉尚而方來之不泯者已公之仲氏今刑部侍郎  
致仕子融厚陟岡之義於公遺美之所追載見命爲記姑筆其大  
畧云大宋至和三年丙申歲壬辰月丙寅日建翰林侍詔承事郎  
守太子洗馬司正賜紫李九思書並題額御書院玉冊官孫文吉  
鐫大觀元年七月二十二日藝華命摹勒上石

宋吳正肅公墓誌銘

嘉祐四年歐陽修撰碑文載藝文志



宋歐陽文忠公墓誌銘

熙寧八年韓琦撰宋敏求書韓維題蓋碑

亡文載藝文志

宋比部員外郎崔君墓誌銘

熙寧十年韓琦撰碑亡文載藝文志

宋鄭文正公墓碑

碑在墓旁今仆長二丈許額長六尺餘承碑石

跌高六尺餘額有皇帝御書四字碑文云政和寅亮醇儒宰臣文

正鄭居中墓每字約尺許皆正書

宋贈尚書魚公墓誌銘

石在縣南太清觀中其文曰大宋故右諫

議大夫贈尚書工部侍郎魚公墓誌銘二十篆字乃銘蓋也其下

誌銘已失傳據宋史官職應是魚周詢惜未得其文不敢遽定也

又觀中有二石皆銘蓋一刻大宋故贈左千牛衛大將軍魚公墓



誌銘一刻宋朝請大夫致仕吳公墓誌銘俱未詳附識之以俟考  
宋故朝請大夫龍圖閣待制又兼京西南路安撫吳公墓誌銘 石  
在自然山寺僅存銘蓋二十四字餘亡今復爲人毀作柱礎石矣  
宋劉君墓誌銘 石在觀音寺今移入文廟原文見後

宋故通直郎權發遣開封府推官公事賜緋魚袋劉君墓誌銘

并序

右朝奉郎權蔡河撥發摧赴緡運騎都尉賜緋魚袋韓宗文  
撰并書

左朝散郎行將作監丞雲騎尉賜緋魚袋丁恂題蓋

君諱仲熊字子元世家汶陽後徙居鄭今爲鄭人尚書屯田郎中  
贈吏部尚書諱益之曾孫太常博士贈兵部尚書諱賓之孫光祿



卿諱襲禮之子也君少好學問一舉進士不中以蔭補太廟齋郎  
調郾川洛郊縣尉余伯父獻肅公宣撫陝西一見君器之遂辟置  
幕下再調開封府長垣縣尉縣多盜至白晝剽畧城市民不安居  
君窮迹盜處或踰月不歸捕獲主輩擒大盜十數輩盜乃屏息一  
境爲清遷懷州防禦推官知蔡州平輿縣未行舉充開封府雍丘  
縣丞雍丘事劇難治君到官之初會攝邑事聽斷剴決庭圉無留  
繫用薦者改大理寺丞開封府界提點司辟管勾文字年勞遷太  
子中舍官制行通直郎時朝廷一新法度遣使四出而恣意生事  
之人務爲刻急失朝廷意遠民尤受弊上患之於是始難於擇才  
乃以君提舉夔州路常平等事君以親遠辭弗許乃奏乞仲弟移



許州教授以便親養詔從之督君就道旣入境延見官吏訪民疾苦更法之不便者奏請教法行諸路君獨以平允稱丁父喪服除詔爲開封府推官開封浩穰案牘填委前爲吏者漫不知省君聽決精敏處之裕如也更有詐君書以求賞者君察字畫有異遣吏索其家前後造僞者非一吏引伏會恩當減君曰吏罪暴露若是而可釋何以禁戢姦惡素乞配隸遠方自是老姦宿贓欲手重足無一敢妄動者中書吏得書匿名告叛者十餘人執政官以聞上付開封窮治府君以示君君曰是必詐也且實有叛者豈不明告有司以利厚賞而匿名爲或君卽假以巡按屬邑廉驗亡實獲造書者乃封邱人劉延祚所告皆仇人也一問伏辜獄具從尹對上



喜諭君曰非卿才術之敏豈能爾耶君頓首謝曰非臣之知尹教然也上尤嘉歎君不伐善獄空賜五品服上嘗欲以君爲京東轉運副使大臣或言君吏治彊敏府事所賴未可去也時河決澶淵畿邑多被害詔君領賑濟事君按行境上安集流散所活萬餘人未幾感疾輿歸府舍竟不起享年四十二實元豐五年十月十六日也上聞之嗟悼命一子官君性質穎悟沈深有智畧平居恂恂如不能言及遇事勇於敢爲其聽獄決訟發奸摘伏雖老於吏者不遑也事母孝左右就養無違禮與兄弟居人無間言與朋友交久而敬仲弟早世待其子猶己子也故君之卒其遺恩官仲弟之子而君之子不與焉蓋君志也君初娶酈氏再娶韓氏封仁壽縣



君今資政殿大學士之女予之妹也子二人長曰池齊州長清縣尉好學有立次曰勺尚幼女六人長適開封府封邱縣尉韓紹次適前隴州汧原縣主簿范昌壽亦皆卒餘未嫁其子池將以元祐二年十一月二十日塋君于新鄭縣之魯固原請銘於予曰先子不幸早世志雖不遂然施設之方概亦可見非託銘于知者恐無以傳示不朽余固知子元有志于事者朝廷方且見用而亡矣是可哀也其可不銘乎乃爲之銘曰顯允劉君質茂材美粵從下僚挺身奮起譽顯於朝屢見器使出持使節列旆振弛入佐畿治姦慝消彌所蘊未究俾用曷已匪時不逢而壽迄此魯固之原塋從其先勒銘幽石萬世之傳



宋奉議郎王君墓誌銘

石在崇孝寺東陳家村觀音堂有蓋鐵線

篆文曰宋奉議郎王君墓誌銘銘九字一石鐫誌銘八百三十六字書法神似歐陽率更又有章縣君墓誌石一與奉議郎誌石同在廟中縣君卽王之配也銘石有額無蓋長四尺餘額篆宋故崇德縣君章氏墓誌之銘下書誌銘于文左字多漫漶損十之八文義已不能緒其可辨者夫及諸子官名與王誌合縣君曾祖頻父淦淦北宋名臣宋史有傳原文見後

宋奉議郎監亳州永城縣倉武騎尉王君墓誌銘

趙郡李之儀撰并書

上卽位初有詔求直言言者務取稱多浮其實君曰不切於事而

直焉將何以信乃上書請有所訓抑宰相以君沮言路斥監亳州  
永城縣倉明年道京師得司馬溫公諫草嘗指君考爲姦邪君泣  
謂所親曰先人遭遇潛邸時宗室未有禁也顧可與衛綰辭太子  
飲張美知世宗將入繼而奉之同日語哉苟不得直我死不瞑矣  
言未達疽發於背遂卒元祐二年六月癸卯也九月壬申葬於鄭  
州新鄭縣旌賢鄉之賈村君姓王氏諱得君字道弼大名城安人  
今家鄭州管城曾祖扶尚書刑部員外郎直集賢院祖師顏左侍  
禁贈特進考廣淵龍圖閣直學士尚書工部郎中贈通議大夫妣  
譙國郡太君盛氏娶章氏崇德縣君六男六女男曰惟忻懌懌惕  
悰惟試將作監主簿忻河中府河東縣尉女皆未行惟懌及一未



名一女先君卒君忼慨有大志視天下無難事讀書至功名之際  
必掩卷嗟味以不及爲可惜與人交不間毫髮客至盛饌惟所欲  
具周人之急無遠近疎戚蓋無明日飯弗計也至就木衣不能更  
雅善射飲酒斗餘秀眉明目論議俊偉見者知其爲奇男子也嘗  
會射或出一留犂鍾容可數升令曰能破的而酌此者予鍾君笑  
曰聊以爲君歡手二矢起一發中之一座大呼退舉鍾無餘座復  
大駭遂揖其鍾博搯敏思每執筆人以其方思也而數千百言已  
在紙字畫端勁善世其家其小楷則又能得古人所用意通議師  
環慶士卒應得賞旣上而報不以時遽欲庫兵反通議遣君招拊  
君單馬往諭恩信瞭然遂聽命曰微吾龍圖老子而郎君語動人

則屠其城必矣上聞之以君可任大事君以蔭補將作監主簿賜  
進士出身歷監下御司審官東院主簿太僕寺丞將作監主簿軍  
器監丞自下卸至將作皆上親擇以命最後軍器復從中出官制  
行太僕事兼舊數司頗難其責宰相有所擬上曰已有人矣乃自  
懷中出君姓名後朝正旦帝人微幕不謹毀新王輅御史以君在  
宿不可獨免上不得已罷君未幾命還君故物宰相以無闕員對  
久之上特員外置君將作君雖厚陵故人子而尤爲神宗所知然  
其進常脫畧恩舊用其所自効君亦萍礪激奮思有以當上意故  
其所見率憤悱踴躍無所避回皆謂君且頸矣而官止於奉議郎  
年不踰四十則又爲君哀之也君所爲文未嘗留藁亦時爲人所



得讀之者可以知其志也余於君仲父弟承嘗察也於是以其從  
子棟之狀來請銘余知君晚恨有所不能盡姑以是爲銘銘曰志  
於行則厲才於用則餘我馬我車而弗畀之途銘以哀之以告不  
誣

宋故崇德縣君章氏墓誌銘

弟朝 郎宗正寺丞 騎尉

奉議郎宗正寺正主簿

銘曰於嗟崇德柔淑而順閑禮法兮天資明爽心計精敏事辦了  
兮助成夫志安于斥逐識高邁兮以己子恩與庶女夫心平均兮  
天性疎財周人之急無所吝兮雙親東歸乃不得見命何薄兮賈

村新阡既安且固千萬年兮石可磨泐實不可毀銘詩昭兮

宋寂默居士晁君墓表 元祐五年晁補之撰文載藝文志

按宋文選載此文 中州金石考因之故亦附錄

宋歐陽文忠公神道碑 崇寧五年蘇轍撰碑在墓東已仆字跡已

不可辨文載藝文志

宋鳳臺寺浮圖題名 浮圖石門刻字 缺一字 胡世程陳廻丁恂慕容

渙梁堅郭某同遊十六字又有恩任鄧州通判恭覽祖考手澤不

勝涕戀宣和元年八月初七日二十五字又有二十日恭拜先塋

過此男承議郎直龍圖閣 名二恭題十九字 又有月七日謁朝假

詣先太師塋焚黃恭覽先中書留題二十字月字上應有缺文恩



任以下三行在浮圖門外刻

宋王銑石幢 幢在郭店保安寺中前刻陀羅呢經後題此書法肖

皇祖碑原文見後

長男成忠郎特差權鄭州新鄭縣巡檢王銑奉爲先考安撫大使  
先妣室人夏氏陳氏特建華梵尊勝經幢墳側仰憑佛力用薦神  
遊俱超苦趣永託淨方劫名未殫勝因曷已宣和六年四月十五

日銑謹題

宋陀羅呢經石幢

幢在歐陽寺中宋王庠爲

缺一字

廟墓立

宋大理評事

缺一字

君石幢

幢在歐陽寺中前刻陀羅呢經後書此

內缺十二字皆爲人鑿去者原文見後

宋故大理評事

缺一字

君以治平三年丙午歲正月六日塋于鄭之

新鄭縣先塋之東北以安氏祔焉既塋之十月其妻薛氏率其子

男立幢刻隨羅呢梵呪于其上所以

缺一字

冥福而慰塋魄也君諱

廓字希聖其先蒲中人皇祐六年十一月十四日啟手足于陝州

之

缺九字

此不復紀

缺一字

月壬午朔子婿朝奉郎尚書都官員外郎

新差通判冀州軍州事上騎都尉賜緋魚袋王庠記 河東郡薛

氏 長男進士楫 次男進士延 長孫君謨 次孫君輔

彭文邁刊

朱劉君墓誌銘 石在歐陽寺中僅存篆書宋大理評事劉君墓誌

銘十字餘亡



宋輕車都尉歐陽公墓誌銘 石在歐陽寺中僅存篆書宋故奉政

大夫輕車都尉歐陽公墓誌銘十六字餘亡

宋戶部尚書林公墓誌銘 石在同助村僅存墓誌蓋鐵線篆宋故

戶部尚書贈左僕射林公墓誌銘餘亡

宋通直郎呂君墓銘 石在城內僅存墓蓋篆書宋通直郎呂師履

墓銘九字係柳葉篆餘亡

宋楊府君墓銘 石在郭店西岡王村關帝廟

缺字

直郎楊府君墓

銘八字餘亡

金牒崇孝禪院石刻 石在崇孝寺牆上式與宋旌賢院牒同原文

見後

尚書禮部 牒

尚書禮部 牒

頴順軍新鄭縣據第三都陳村故太師孫男陳舟等狀告爲  
本村有先祖三令公墳寺壹所於前宋賜到崇孝禪院爲額  
緣經兵火將勅黃毀燒了當今情願承買到空頭

勅壹道乞依舊額書填施行者

牒奉

勅特賜崇孝禪院牒至准

勅故牒

大定叁年陸月拾伍日奉



朝請大夫行太常丞權員外郎劉

中憲大夫行員外郎李

郎

中

侍

郎

金靈泉禪院牒

石在靈泉寺舊埋土中生員李垣築掘土得之上

截刻禮部牒下截刻記後二行刻酒務都監二人名已採入職官  
表原文見後

尚書禮部

牒

有字漫漶不可辨

牒奉

勅賜靈泉禪院牒至准

勅故牒

朝請大夫行太常丞權員外郎劉

中憲大夫行員外郎李

郎中

侍郎

鈞州新鄭縣第三鄉奉順村靈泉禪院記

釋氏之教大率勸善懲惡可以助邦國之治故能久而不已其所立法蓋亦多門至於建廟若華芬是其一端也較於衆善蔭惟艱哉故聚沙爲塔表積習之初布地以金示純誠之至季世而下



若倡首勸緣隨喜贊助以至是而潤色者成而保全者皆得無量

福果信不誣焉夫缺四者缺一有僧彦缺一來自中牟隱錫斯地

勸誘鄉缺七一方兩賜禱祈之所會大定三年國家許請名額乃

竭力化導缺十是年八月准勅牒賜名靈泉繼而又以戒牒度門

弟子三人其一缺九三年八月剃其三日宋涓五年二月缺九涓

旅院門功績為最有堂構之譽涓缺九年十三出家禮轂師受業

至是得度受缺五迄大定十三年以本師屬累缺一持是院愈加

增益缺三院宇堂殿已及五十餘間輪焉奐焉式壯且麗正缺一

嚴奉如來之粹容法堂高揭天宮之寶帳阿羅漢列處於偏殿執

金剛對立於正門凡此數事皆涓師之所營辦又以承安四年進

卷二十一  
三  
納度小師三人重奕重惠重宣泰和元年進納度小師重詮因曰  
是院也吾師翔之既已勞矣我輩繼之粗已完矣諸弟子守之宜  
其謹矣念昔所賜院額勅牒當爲永傳不朽之計遂命工摹勒于  
貞石廼託敬公法師求記於予予與敬公則方外友也具道始末  
聞之亦足嘉尚義不必辭乃直書歲月以記之時泰和二年七月  
初七日史庵老人馮仲端記并篆額

皆大金泰和二年

缺三字

住持沙門僧重涓立石

南梁皇甫顯書

并刻

管酒務都監張濟石抃

金隱士畢固墓碑  
碑在郭店西南銅佛趙村觀音堂內中一行書



金故黃涯釣徒抱癡子畢固七十六齡之墳左書鄰叟蓬頭奴趙  
素遵治命塗丹右云奉祀男守默督工立石碑陰刻皆泰和甲子

八月望二日鐵筆硯菴李繼民鐫

元許魯齋先生祠堂記 碑在祠中至大二年邑令鄭冲霄撰呂士

文書文載藝文志

元新鄭社稷壇記 碑在壇側至正十六年姚珩撰文載藝文志

明許魯齋先生祠堂記 碑亡河津薛瑄撰文載藝文志

明裴孝子廬墓記 碑在縣西北裴家岡成化十二年邑人御史邵

進撰爲孝子裴鐸立事詳人物志

明幽勝寺記 碑在寺中成化十三年邑人邵進撰文載藝文志

明重建廟學記

碑在學宮成化十八年都御史鄆縣屠瀟撰文載

藝文志

明邑侯黃公肅德政碑

碑在大路旁宏治元年寧國知府劉槃撰

明重修卧佛寺記

碑在寺中宏治三年邑人劉槃撰文載藝文志

明重修城隍廟前門及寢宮記

碑在廟中宏治六年邑人劉槃撰

明重修太清觀記

碑在觀中宏治十二年邑人渭南知縣楊同撰

明甲科題名記

碑在學宮宏治十六年邑人御史史載德撰文載

藝文志

明重修三賢堂記

碑在堂中宏治十三年邑人隴州同知劉裴撰

明重修譙樓記

碑在縣署正德二年晉州學正河陰和春撰文載



藝文志

明重修水月寺碑記

碑在寺中正德六年邑人史載德撰文載藝

文志

明孝子張燧隱處

碑在風斤鎮正德六年立

明重修廟學記

碑在學宮今不存年月未詳邑人光祿少卿高尚

賢撰文載藝文志

明修東嶽廟記

碑在廟中正德八年邑人高尚賢撰文載藝文志

明邑侯吳公仲紀去思碑

碑在大路旁正德十二年立邑人高郵

知州郭綬撰

明工部都水司郎中高魁墓誌銘

正德十二年南京兵部尚書儀

封王廷相撰文載藝文志

明祭歐陽文忠公墓文 碑在墓前正德十六年山東左布政使廬陵陳鳳梧撰文載藝文志

明重修二郎廟記 碑在廟中嘉靖九年邑人右都御史高捷撰

明重建子產祠記 碑在祠中嘉靖十年訓導程天時撰

明重立吳正肅公墓碑 碑在縣北三十里堡路旁嘉靖十一年釣

州知州廬陵劉魁立今僅存下半正肅公墓四字

明重立呂正獻公墓碑 碑在縣北郭店驛南嘉靖十一年知州劉

魁立

明重立歐陽文忠公墓碑 碑在北關大路旁嘉靖十一年知州劉



魁立其碑陰有詩亦魁作載藝文志

明重修譙樓記

碑在縣署嘉靖十四年訓導閩中吳栢舟撰文載

藝文志

明重建清源義勇祠記

碑在廟堦下嘉靖十五年邑人高尚賢撰

文載藝文志

明石洞寺記

碑在寺內嘉靖二十五年右副都御史鈞州黨以平

撰文載藝文志

明楊處士墓表

碑在楊氏祖塋嘉靖二十六年邑人高尚賢撰文

載藝文志

明重修歐陽文忠公祠墓記

碑在歐陽寺嘉靖三十二年鈞州州

司徽州方瑜撰皇甫恩書文載藝文志

明漢留侯祠碑記

碑亡嘉靖時邑人大學士高拱撰文載藝文志

明刻醉翁亭記

宋蘇軾書明高拱刻在新鄭高氏家藏有趙孟頫宋廣吳寬沈周

文彭高拱諸跋

趙孟頫跋此宋學士東坡蘇公之筆趙子固家藏舊物也今爲伯

田馮先生所得余在京時嘗見此卷于高仁卿家前後有子固印

識今悉無之想爲俗工裁去詎謂神物而灾亦見侵如是然而字

畫未損猶幸甚耳或者議坡公書太肥而公却自云短長肥瘦各

有度玉環飛燕誰敢憎又云余書如綿裏鍼余觀此帖瀟灑縱橫



雖肥而無墨猪之狀外柔內剛真所謂綿裏鍼也夫有志于法書者心力已竭而不能進見古名書則長一倍余見此豈止一倍而已不識伯田之所自得又幾何元貞二年四月一日持來求跋聊爲草草

宋廣跋此帖有趙松雪跋語爲東坡翁真筆無疑旣識而藏之可不寶諸

吳寬跋蘇文忠書早師顏魯公嘗大書醉翁亭記刻石尚不改魯公家法晚喜李北海書則稍去圭角變爲圓熟舊時剛方筆仗不能盡脫此復書亭記真行草相間別有一種奇逸予學公書多年故考其淵源特爲贊歎予書得其彷彿實隸公之下不勝慚惶云

沈周跋蘇氏父子兄弟皆遊歐公門下故東坡樂書此記亦歐公平生得意之文趙松雪觀此書云長一倍書法昌裔亦號名能書二公品裁可信可寶

文彭跋右蘇文忠公草書醉翁亭記後有趙文敏宋昌裔吳文定沈石田諸公題識其爲真跡無疑然筆畫奇逸殊不類其平日所書舊嘗見東坡雜帖中有雲缺月駛舟行岸移八字公自題云此書真似楊風子蓋楊少師書宋初極重而傳世甚少豈公嘗愛而學之耶此記筆法大與八字相類亦足爲一驗也昔子由題懷素自敘云予兄和仲特善行草惜不令其一見然則公蓋嘗留心於草聖者特世少見耳大抵人品旣高下筆自然不同昔杜祁公楷



書方巖而晚乃以草聖見稱蓋高人韻士胸中無所不有不可以  
一律論也中元師相命彭摹勒上石以見東坡草聖之妙敬題其  
後

高拱跋此卷得之釣陽徐穎南氏穎南告予曰一老傭入徽府拾  
此於塗泥踐踏中祚以豆數斗易得予聞而悲之荆山之璧遇識  
者千金不易也而顧棄之塗泥卽幸脫塗泥也亦纔易豆數斗耳  
此公負絕世之才時不能用且遭摘陷垂死者屢塗泥孰甚焉晚  
雖召還竟不大用以殂亦易豆數斗而已矣傷哉然此卷至今存  
予猶得以寶之亦未爲不遇也而此公已不可作乃尚不如此外  
之遇然則當時君相豈不皆卞和也哉

王世貞弇州山人跋新鄭公家藏蘇書醉翁亭記今刻之石結法  
遒美氣韻生動極有旭素屋漏痕意第不類蘇長公惟渴筆一二  
得似耳豈公沒後王逸老筆耶或陸務觀張溫甫輩戲筆耶

趙嘏石墨鵲華跋此新鄭公得之徽廢邸者文壽承摹刻故能縱  
橫自如字字不失真態余蓄此帖亦時展玩其中無一筆類長公  
者筆法雖不能盡脫宋習却勝長公何不自顯姓名而署長公殆  
不可曉

明尊恩閣記 碑在閣中隆慶六年邑人高拱撰文載藝文志

明右都御史高公捷入鄉賢記 碑在祠前隆慶六年邑令翼城燕

好爵撰



明光祿大夫柱國少師中極殿大學士高公神道碑 萬歷五年大

學士安陽郭樸撰文載藝文志

明鄭大夫子產祠碑記 碑在祠中萬歷六年邑人高拱撰文載藝

文志

明太師高文襄公墓誌銘 萬歷六年侍郎江夏郭正域撰文載藝

文志

明創置學田記 碑在學宮萬歷十一年御史禹州安九域撰文載

藝文志

明重修尊恩觀大門記 碑在觀中萬歷十一年邑人經歷高才撰

明重修石洞寺伽藍殿記 碑在寺中萬歷二十四年僧興冬撰

明學宮創置祭器書籍碑記

碑在學宮萬歷二十六年署訓導廬

江徐鈇撰文載藝文志

明改建社稷壇記

碑在壇內萬歷二十八年教諭江夏郭正位撰

文載藝文志

明谷孝子碑

碑在縣治西爲孝子谷天祿立

明關帝廟禱雨記

碑在廟堦下古槐中萬歷三十年邑令劉曰偉

撰原文見後

嘗謂乾坤之義氣獨完於關聖萬古人心脉脉思之是以遇邑必有祠祠必有植昭神蔭也新邑東有祠祠前有大樹圍抱蓋不知幾千百年矣中空外直枝葉濃郁皆爲元德公當年車蓋或亦若



此偉初宰新首謁公祠攬此樹奇秀虬曲空中直透天睨輒神焉  
廼壬寅夏旱偉躬禱越十有三日乃神之誕毓期也又偕僚屬稽  
首忽空中無雲而雨葉滴滴如珠神哉又越二日出郊見赤日之  
行天仰而嘆曰下吏不職何辜于民乃詣神祠下再泣再訴忽密  
雲四布雷聲隱隱出樹間亟歸署而滂沱及矣神哉諸父老懽騰  
望此樹瞻拜者幾萬人敬爲之記蓋公忠義天植而蔽芾下土若  
斯也因創祭典每歲以五月十三日虔修牲帛以祀又令羽衣時  
封植此樹毋忘神庥以培我甘棠萬歷壬寅仲夏知新鄭縣事劉  
曰偉撰

按碑現在槐樹中亦邑中之勝蹟也故附錄之

明重修太乙宮記

碑在宮內萬歷四十一年邑人昌樂知縣劉紹

芳撰文載祠祀志

明孝廉承源劉公墓誌銘 天啓二年尚書孟津王鐸撰

明重修儒學記 碑在學宮天啓五年邑令內江張聚垣撰

明建玉仙宮樂樓記 碑在廟中崇正四年立

明重修三堂寺伽藍殿記 碑在寺中崇正八年張天召修

明高氏祖塋初置祭田記 碑在高氏祖塋崇正十二年邑庠高則

謙撰文載祠祀志

國朝重修太清觀碑記 碑在觀中順治八 years 左真印撰

國朝重建新鄭學宮記 碑在學宮順治十五年提學道歙縣朱廷

瑞撰文載藝文志



國朝重建公孫大夫國子產祠記

碑在祠中康熙三年邑令鎮海

謝鴻奇撰文載藝文志

國朝署邑令張公成功德政頌

康熙五年邑人四川提學道張光

祖撰

國朝重修文襄高公祠堂記

碑在祠中康熙九年邑令江陵李永

庚撰文載藝文志

國朝新建興學書院記

碑在書院康熙十四年邑令李永庚撰文

載藝文志

國朝建準提閣記

碑在書院旁康熙十四年邑令李永庚撰文載

藝文志

國朝李侯讀書堂記 碑在書院康熙十四年邑人張光祖撰文載

藝文志

國朝邑侯李公永庚去思碑 碑在路旁康熙十四年立

國朝四川提學道張公墓誌銘 康熙十九年叅議道祥符王廷璧

撰文載藝文志

國朝創建戴惠橋記 碑在鳳臺寺右康熙二十年邑人黎平知府

劉楨撰文載藝文志

國朝河南王大中丞題請消折碑記 碑在縣署前康熙二十二年

邑令烏程閔圻山題賦役志

國朝重修新嘉縣儒學記 碑在學宮康熙二十七年邑令長山石



曰琮撰文載藝文志

國朝重建許魯齋先生祠堂記

碑在祠中康熙三十七年邑令石

曰琮撰文載藝文志

國朝署邑令程公雲衢德政記

碑在縣署前康熙三十七年邑人

井研知縣白士宏撰

國朝新鄭學名宦鄉賢二祠記

碑在學宮康熙四十四年署邑令

會稽章貞撰文載藝文志

國朝東嶽廟田記

碑在廟中康熙四十四年邑人州判張信撰

國朝邑侯毛公洛豁免三關入城供役碑

碑在縣署前康熙四十

六年立

國朝軒轅故里碑 碑在北門外康熙五十四年邑令許朝柱立

國朝邑侯余公義年德政記 碑在鳳凰臺東南隅康熙五十五年

邑人內閣中書劉曰炷撰文載藝文志

國朝大成殿重建圍堂石欄記 碑在學宮康熙五十五年署教諭

洛陽郭岱鎮撰

國朝重修雲灣洪福寺記 碑在寺內康熙五十七年禹州劉玉威撰

國朝子產乘輿濟人碑 碑在南關大王廟前

國朝涵癡蘇君墓表 康熙五十七年邑人劉曰炷撰文載藝文志

國朝邑侯王公大綸戴德碑 碑在路旁康熙五十九年立

國朝文龍郭公重修儒學記 碑在學宮康熙六十年署邑令劉曰



韓侯

國朝典史余公後勤勞仁慈碑 碑在縣署前雍正元年立

國朝重修儒學記 碑在學宮雍正二年邑令孝感王大綸撰

國朝重葺鄭大夫子產祠記 碑在祠中雍正十一年總督平越王

士俊撰文載藝文志

國朝邑侯王公不黨惠民碑 碑在縣署前雍正十一年立

國朝重建馬神廟碑 碑在郭店驛乾隆二年邑令墊江陳中撰文

載藝文志

國朝郭店馬神廟記 碑在郭店乾隆八年邑令宣城汪昌國撰文

載藝文志

國朝重修啟聖宮明倫堂暨諸亭樓記 碑在學宮乾隆十一年邑

令平陸王大樹撰文載藝文志

國朝重修文廟碑記 碑在學宮乾隆十一年邑人白士宏撰

國朝邑侯王公大樹去思碑 碑在縣署前乾隆十一年立

國朝重修興學書院兼復膏火記 碑在書院乾隆十三年署邑令

孫映璧撰

國朝增廣書院生童膏火記 碑在書院乾隆十七年邑人庠生毛

大勇撰

國朝興學書院記 碑在書院乾隆十八年進士餘姚邵自鎮撰文

載藝文志



國朝重修三清殿記

碑在尊恩觀乾隆十九年邑令光化舒鴻儒

撰

國朝重修土地祠記

碑在祠中乾隆十九年邑人蘇瑞榴撰

國朝高氏塋田創建廬舍記

碑在高氏祖塋乾隆二十三年邑庠

高鵬程撰文載祠祀志

國朝重修新鄭縣文昌祠記

碑在鳳臺寺乾隆二十六年河南督

學鳳臺秦百里撰文載藝文志

國朝重修卧佛寺大殿記

碑在寺中乾隆二十八年邑令南海何

如澧撰文載藝文志

國朝順寧太守暢亭劉公墓誌銘

乾隆三十五年宮詹昌平陳浩

撰文載藝文志

國朝重修節孝祠碑記 碑在祠內乾隆三十五年邑令新城魯鴻

撰文載藝文志

國朝重修玉皇閣記 碑在閣中乾隆三十五年邑人舉人李溶撰

國朝邑侯賀公基輦德政碑 碑在北關外乾隆三十八年立

國朝邑侯陶公應遇去思碑 碑在北關外乾隆三十八年立

國朝趙御衆書金剛經石幢 幢在鳳臺寺

附考古圖秦雙魚洗得於新鄭形制與四錢大洗同而差小皆

有宜子孫三字邊有雙魚爲飾邑志周太祖陵前舊有石刻云

周天子平生好儉約遺令用紙衣瓦棺嗣天子不敢違也今亡



新鄭縣志卷之三十

經籍志

班固倣劉向七畧志藝文隋書因之作經籍至宋則有畧有考其爲古人留名山之業意深遠矣諸書詳畧不同而以馬端臨所撰爲最善蓋能詳厥源委不僅列名目而已地志猶史也邑雖小乏著述家然著于史與傳於世者非上古之鴻書卽諸子之菁華也竊取通考之例集爲一卷而以近世所撰附入之不分四部者從其簡焉作經籍志

黃帝書

黃帝四經

丹書

見銘類

〔列子〕天瑞黃帝書曰谷神不死是謂元牝元牝之門是謂天地之

根綿綿若存用之不勤又曰形動不生形而生影聲動不生聲而

生響無動不生無而生有力命篇黃帝之書云至人居若死動若

械列子多引黃帝書蓋古之微言傳久而差者也晉天文志黃帝書曰天在地外水在天

外水浮天而載地者也東京賦注風俗通曰黃帝書上古時有神

荼鬱壘呂氏春秋黃帝言曰聲色禁重黃帝曰帝無常處也有處

者乃無處也芒昧因天之威與元同氣黃帝曰四時之不正也正

五穀而已矣又云嘗得學黃帝之所以誨顓帝矣爰有大圖在上

大矩在下汝能法之為民父母六韜黃帝曰一者階於道幾於神

漢藝文志道家黃帝四經四篇黃帝銘六篇黃帝君臣十篇起六國時

與老子相似雜黃帝五十八篇六國時賢者所作陰陽家黃帝泰素二十篇六國時



時韓諸公  
子所作

小說家黃帝說四十篇兵陰陽黃帝十六篇圖三卷

行家黃帝陰陽二十五卷醫經黃帝內經十八卷外經三十七卷

〔史記〕黃帝老子言正義曰黃帝道書十卷

蓋公善治黃老言曹參治齊用黃老術黃太后

好黃老言〔後漢志〕天文星官之書自黃帝始歷志黃帝班示文章〔隋志〕

漢時諸子道書之流有三十七家大旨皆去健羨處冲虛其黃帝

四篇老子一篇最得深旨〔周禮〕

外史掌三皇五帝之書

注所謂三墳五典

晉皇甫謐曰黃帝創制於九經

見史記注

列子云黃帝得長生之道在位百年

唐獨孤

及風后八陣圖記云得其遺制於黃帝書之外篇梁肅導引圖序

朱少陽得其術於黃帝外書賈誼新書修政語黃帝曰道若川谷

之水其出無已其行無止

上疏曰黃帝曰日中必萑注見六韜

〔淮南繆稱訓〕黃帝曰

芒芒昧昧從天之道與元同氣

黃帝銘

巾机法

孔甲盤孟

見著書類

〔漢志〕道家黃帝銘六篇雜家孔甲盤孟二十六篇田蚡傳學盤孟

諸書應劭曰黃帝史孔甲所作銘也凡二十六篇書盤孟中所以

爲法戒

七畧曰孔甲黃帝之史

皇覽記黃帝金人器銘曰武王問尚父曰五

帝之戒可得聞乎尚父曰黃帝之戒曰吾居民上搖搖恐夕不及

朝故爲金人三封其口曰古之謹言文心雕龍黃帝刻輿几以弼

違大禹勒筍簋而招諫〔朱穆傳注〕黃帝作巾机之法孔甲有盤孟

之誠〔劉存事始〕蔡邕銘論曰黃帝有金几之銘

黃帝河圖



晉天文志黃帝受河圖始明休咎魏志注黃帝受命風后河圖河  
圖挺佐輔云天老告黃帝曰河有龍圖洛有龜書帝游翠鳩之川  
有大魚出魚沒而圖見詩正義六藝論云太平嘉瑞圖書之出必  
龜龍銜負焉黃帝堯舜周公是其正也

黃帝龍袞頌

樂書黃帝作龍袞頌

黃帝柷鼓曲

風雅逸篇楊慎曰黃帝作柷鼓曲十一震雷驚二猛虎駭三驚鳥  
擊四龍媒蹀五靈夔吼六鵬鶚爭七壯士奮怒八熊羆哮吼九石  
盪崖十波盪壑

按歸藏啟筮曰蚩尤出自羊水疏首登九淖以伐  
穹乘黃帝征之涿鹿之野作柷鼓之曲雲笈云黃

帝出師此鹿絕轡之墊以桐鼓為警  
衛其曲有十竝各有辭其辭亡考

黃帝兵法圖三卷

漢書藝文志黃帝兵法十六篇胡建傳上奏曰黃帝李法曰壁壘

已定穿窬不繇路是謂姦人姦人者殺

顏師古注李者法官之號  
主征伐刑獄之事故名其

書為  
李法

黃帝內經

漢書藝文志黃帝內經十八卷唐王冰曰素問即其經之九卷也

兼靈樞九卷迺其數焉雖復年移代革而授學猶存懼非其人而

時有所隱故第十卷師氏藏之今之奉行惟八卷而素問九卷是

甫士安名為鍼經楊元操云黃帝內經二帙帙各九卷按隋志謂



之九靈王冰名爲靈樞素問第七卷亡已久士安序甲乙經云亦有亡失隋志載梁七錄云止存八卷而冰得舊藏之卷今竊疑之天元紀大論五運行論六微旨論氣交變論五常政論六元正紀論至真要論七篇與餘篇畧不相通疑此七篇乃陰陽大論之文王氏取以補所亡之卷又曰黃帝坐明堂之上臨觀八極考建五常與岐伯上窮天紀下極地理遠取諸物近取諸身更相問難於是雷公之倫授業傳之而內經作蒼周之興秦和述六氣之論述人得其一二演而述難經倉公傳其舊學仲景撰其遺論晉皇甫謐刺而爲甲乙隋楊上善纂而爲太素全元起始爲訓解闕第七一通唐寶應中王冰得先師所藏之卷爲注合八十一篇二十四

卷按隋志始有素問之名晉皇甫謐已云素問論病精辨王叔和  
西晉人撰脉經云出素問鍼經漢張仲景傷寒論集云撰用素問  
是則素問之名起漢世也全元起曰素者本也問者黃帝問岐伯  
也按乾鑿度太素者質之始名或由此館閣書目黃帝鍼經九卷  
八十一篇與靈樞經同鍼經以九鍼十二原爲首靈樞以精氣爲  
首間有詳畧程子曰素問之書必出於戰國之末夏竦銅人腧穴  
針灸圖經序曰黃帝問岐伯盡書其言藏於金蘭之室洎雷公請  
問其道乃坐明堂以授之後世言明堂者以此郡齋讀書志跋云  
右唐王冰注先是第七亡逸冰時始獲乃詮次注釋凡八十一篇  
分二十四卷今又亡刺法本論二篇冰自號啟元子



黃帝陰符經

唐書藝文志集注陰符經一卷宋史藝文志太公等陰符經注一卷張果陰符經注一卷陰符經辨命論一卷袁淑陰符經注一卷雲笈七籤廣成子曰陰符二字上可通天下可察地中可化生萬物惟人最尊陰闇也符合也古之聖人內動之機可以明天地造化之根至道推移之源性命之本生死之機故曰陰符也李筌陰符經注序略云陰符自黃帝已有之蓋聖人體天用道之機也經曰得機者萬變而愈盛以至於王失機者萬變而愈衰以至於亡鄭澣陰符經注序略云雷雨在上典彙旁達後其粹精流而爲聰明蟠碇之遇合金匱之秘奧留侯武侯思索其極朱子全書題陰

符經云陰符以無爲宗謂天下之故皆自無而生有人能自有以返無則宇宙在手矣筌之言曰百言演道百言演法百言演術道一者神仙抱一法者富國安民術者強兵戰勝一句一義三者未嘗不備道者得其道法者得其法術者得其術三之則悖矣陰符經解唐琳曰陰之陰者莫如賊賊者鬼藏而神機者也陰符經元解李日華云陰暗也符合也卽叅同之意陰符經叅注柴挺然曰天地間道理陽極胎陰陰不極不胎陽陽之胎陰以終陰之胎陽以始故陰爲太極之先天後天不符而先天符 經於機之一言三致意焉知陰之爲機機之爲符者可與言陰符陰符經增注張鏡心曰陰符括五千言中庸之秘 陰符總其持三易綜其變



黃帝五家歷書

漢書藝文志黃帝五家歷三十三卷律歷志張壽王上書言黃帝  
調歷漢元年以後課諸歷案漢元年不用調歷壽王及李信治黃  
帝調歷課皆疏闊壽王歷乃太史官殷歷也壽王猥曰安得五家  
歷後漢志黃帝造歷元起辛卯洪範五紀論曰民間亦有黃帝諸  
歷不如史官記之明也晉杜預云或用黃帝以來諸歷以推經傳  
朔日皆不諧合又漢書藝文志黃帝雜子氣三十三篇黃帝陰陽  
二十五卷黃帝雜子十九家方二十一卷

黃帝長柳占夢書

漢書藝文志黃帝長柳占夢十一卷史記正義帝王世紀云黃帝

夢大風吹天下之塵垢皆去又夢人執千鈞之弩驅羊萬羣帝寤而嘆曰風爲號令執政者也垢去土后在也天下豈有姓風名后者哉夫千鈞之弩異力者也驅羊數萬羣能牧民爲善者也天下豈有姓力名牧者哉於是依二占而求之得風后於海隅登以爲相得力牧於大澤進以爲將黃帝因著占夢經十一卷

黃帝雜子步引法

漢書藝文志黃帝雜子步引十二卷列子天瑞篇引黃帝書曰谷神不死是謂元牝梁肅導引圖序朱少陽得其術於黃帝外書又加以元禽化禽之說乃志其善者演而圖之隋志有引氣圖道引圖抱樸子云黃帝論導養而質元素二女著體診則受雷岐西山



真氏曰養生之說出於老子谷神章其最要也莊子曰黃帝得之以登雲天

黃帝岐伯按摩法

〔漢書藝文志〕黃帝岐伯按摩十卷〔唐六典〕按摩博士一人〔注〕崔實正論云熊經鳥伸延年之術故華佗有六禽之戲魏文有五挺之鍛仙經云戶樞不朽流水不腐謂欲使骨節調利血脉宣通〔周禮〕疏劉向云扁鵲使子術按摩

黃帝雜子芝菌

〔漢書藝文志〕黃帝雜子芝菌十八卷黃氏曰神農經五芝久食輕身延年不老先秦之世未有稱述芝草者漢武宣世始以爲瑞寶

帝內傳王母授神芝圖十二卷水經注黃帝登具茨之山受神芝圖於黃蓋童子

黃帝內傳一卷

郡齋讀書志跋云右序云錢鏐得之於衡山石室中後至漢劉向於東觀校書見之遂傳于世

風后孤虛二十卷

漢書藝文志風后孤虛二十卷龜策傳辰不全故有孤虛注六甲孤虛法甲子旬中無戌亥戌亥爲孤辰巳爲虛甲戌旬中無申酉申酉爲孤寅卯爲虛甲申旬中無午未午未爲孤子丑爲虛甲午旬中無辰巳辰巳爲孤戌亥爲虛甲辰旬中無寅卯寅卯爲孤申



酉為虛甲寅旬中無子丑子丑為孤午未為虛隋志遯甲孤虛記一卷伍子胥謨吳越春秋計碗曰孤虛謂天門地戶也後漢方術傳注孤謂六甲之孤辰對孤為虛趙彥為宗資陳孤虛之法從孤擊虛以討賊孟子注天時謂時日支干五行王相孤虛之屬也正義云孤虛之法以一畫為孤無畫為虛二畫為實以六十甲子日定東西南北四方然後占其孤虛實而向背之即知吉凶矣

風后十三篇

圖二卷

漢書藝文志風后十三篇註圖二卷黃帝臣依託也鄭康成云風后黃帝之三公也館閣書目風后握機一卷晉馬隆畧序卷首言本有三其一三百六十字其一三百八十字呂望所增其一行間有公孫宏等語或云武帝令霍光等習之於平樂觀以輔少主傳

卷三十  
天下之不虞今本載所增字亦有公孫宏語薛氏詮定云握奇經  
別有續圖記金草旗麾進退趨鬪之法

力牧十五篇

〔漢書藝文志〕力牧十五篇〔註〕黃帝臣依託也〔崇文書目〕力牧一卷  
李筌太白陰符經序云風后演握奇圖復置虛實二壘力牧亦創  
營圖抱樸子云黃帝精推步則訪山稽力牧講占候則詢風后

黃帝綠圖

〔賈誼新書〕修政語上黃帝職道義經天地紀人倫序萬物然後濟  
東海入江內取綠圖西濟積石涉流沙登於崑崙〔河圖〕挺佐輔黃  
帝齋七日至翠嫫之川魚泝流而至汎白圖蘭葉朱文以授帝與



天老迎之帝舒視之名曰錄圖尚書中候河龍圖出洛龜書威赤  
文綠字以授黃帝淮南子至德之世洛出丹書河出綠圖書正義  
緯候之書乃稱有黃龍元龜白魚赤雀負圖銜書以授聖人正典  
無其事漢自哀平之間緯候始起假託鬼神妄稱祥瑞遠注世本  
曰史皇作圖宋忠曰史皇黃帝臣圖謂書物象尚書璇璣鈴孔子  
曰五帝出受綠圖

鄭書

左傳襄三十一年子產爲政有事伯石賂與之邑子太叔曰國皆  
其國也奚獨賂焉子產曰無欲實難子太叔曰若四國何子產曰  
非相違也而相從也四國何尤焉鄭書有之曰安定國家必大焉

先杜注鄭國史書禮小史注國語所謂鄭書又左傳昭二十八年  
晉司馬叔游曰鄭書有之惡直醜正實蕃有徒注古書名

鄭語一篇

漢書藝文志國語二十一篇左邱明著注鄭語一篇史通左邱明  
既爲春秋內傳又稽逸文纂別說分周魯齊晉鄭楚吳越八國事  
起周穆王終魯悼公爲外傳國語二十一篇

馮促十三篇

漢書藝文志鄭人撰

鄭長者一篇

漢書藝文志註六國時先韓子韓子稱之師古曰別錄云鄭人不



知姓名因學紀聞人主以二目視一國一國以萬目視人主此名言也鄭長者之書見漢藝文志閻若璩註人主二句見韓非子爲齊宣王之語宣王問之鄭長者有言夫虛靜無爲而無見也方爲長者語王氏漢藝文志考證却合

列子 列禦寇撰

漢書藝文志列子八篇劉向校中書列子五篇與長社尉臣參校讎太常書三篇太史書四篇臣向書六篇臣參書二篇內外書凡二十篇以校除復重十二篇定著八篇

天瑞至說符

穆王湯問二篇迂

誕恢詭非君子之言也至於力命篇一推分命楊子之書唯貴放逸二義乖背不似一家之書永始三年八月壬寅上隋書經籍志

列子八卷東晉光祿勳張湛註郡齋讀書志列子九卷跋云右列  
子一書漢唐及本朝藝文志皆謂八卷政和中宜春彭俞爲積石  
軍倅聞高麗國列子十卷得其第九篇曰元瑞於青唐卜者神宗  
皇帝嘗惡後漢范曄姓名欲更修之求東觀記久之不得繼而高  
麗以其本來上裕陵厭代遂不及進元和中高麗使人言狀訪於  
書省無知者醫官已死于其家得之信乎高麗之多異書也

鄧析子 鄧析撰

漢書藝文志名家鄧析二篇劉向序臣所校讐中鄧析書四篇臣  
敘書一篇凡中外書五篇以相校除復重爲二篇子產卒後二十  
年而鄧析死傳或稱子產誅鄧析非也其論無厚者言之異同與



公孫龍同類隔志一卷鄧析子天於人無厚也君於民無厚也父  
於子無厚也兄於弟無厚也何以言之天不能屏勃厲之氣全夭  
折之人使爲善之民必壽此於民無厚也凡民有穿窬爲盜者有  
詐僞相迷者此皆生於不足起於貧窮而君必執法誅之此於民  
無厚也堯舜位爲天子而丹朱商均爲布衣此於子無厚也周公  
誅管蔡此於弟無厚也推而言之何厚之有 異同之不可別是  
非之不可定白黑之不可分清濁之不可理久矣誠聽能聞於無  
聲視能見於無形計能規於未兆慮能防於未然斯無他也不以  
耳聽則通於無聲矣不以目視則照於無形矣不以心計則達於  
無兆矣不以知慮則合於未然矣君者藏形匿影羣下無私掩目

塞耳萬民恐震

獵羆虎者不於外國釣鯨鯢者不居清池何則

囷非羆虎之窟也池非鯨鯢之泉也楚之不汧流陳之不束麾長

盧之之士呂子之蒙恥

慮不先定不可以應卒兵不閑習不可

以當敵廟筭千里帷幄之奇百戰百勝黃帝之師

死生自命貧

富自時怨天折者不知命也怨貧賤者不知時也故臨難不懼知

天命也貧窮無懼達時序也凶饑之歲父死於室子死於戶而不

相怨者無所顧也同舟渡海中流遇風救患若一所憂同也張羅

而畋唱和不差者其利等也故體痛者口不能不呼心說者顏不

能不笑責疲者以舉千鈞責兀者以及走兔驅逸足於庭求援捷

於檻斯逆理而求之猶倒裳而索領

夫自見之明借人見之闇



也自聞之聰借人聞之聾也明君知此則去就之分定矣爲君當  
若冬日之陽夏日之陰萬物自歸莫之使也恬卧而功自成優游  
而政自治豈在振目盭腕手據鞭扑而後不治歟 世間悲哀喜  
樂嗔怒憂愁久惑於此今轉之在己爲哀在他爲悲在己爲樂在  
他爲喜在己爲嗔在他爲怒在己爲愁在他爲憂在己若扶之與  
攜謝之與議故之與右諾之與己相去千里也夫言之術與智者  
言依於博與博者言依於辯與辯者言依於安與貴者言依於勢  
與富者言依於豪與貧者言依於利與勇者言依於敢與愚者言  
依於說此言之術也不用在早圖不窮在早稼非所宜言勿言非  
所宜爲勿爲以避其危非所宜取勿取以避其咎非所宜爭勿爭

以避其聲一聲而非駟馬勿追一言而急駟馬不及故惡言不出  
口苟語不留耳此謂君子也 心欲安靜慮欲深遠心安靜則神  
策生慮深遠則計謀成心不欲躁慮不欲淺心躁則精神滑慮淺  
則百事頃治世之禮簡而易行亂世之禮煩而難遵上古之樂質  
而不悲當今之樂邪而爲滛上古之民質而敦樸今世之民詐而  
多行上古象刑而民不犯教今墨劓不以爲恥斯民所以亂多治  
少也堯置敢諫之鼓舜立誹謗之木湯有司直之人武有戒慎之  
銘此四君子者聖人也而猶若此之勤至于栗陸氏殺東里子宿  
沙氏戮箕文樂誅龍逢紂剝比干四王者亂君故其疾賢若仇是  
以賢愚之相覺若百丈之谿與萬仞之山若九地之下與重山之



顛按劉析子世希傳本於諸書中所見者叢錄之

申子 申不害撰

漢書藝文志法家申子六篇史記申不害傳申子之學本於黃老而主刑名著書二篇號申子注劉向別錄曰今民間所有上下二篇中書六篇皆合二篇已備過太史公所記元帝紀注劉向別錄云申子學號刑名者以名貴實尊君卑臣崇上抑下宣帝好觀其君臣篇唐志三卷崇文總目館閣書目皆缺荀子曰申子蔽于勢而不知知韓非子曰申不害徒術而無法公孫鞅徒法而無術淮南子曰商鞅之啟基申子之三符也申子天道無私是謂恒正天道恒正是以清明地道不作是以常靜帝以是正方舉事

爲之乃有恒常之道符信受令必行也 君子之所以尊者令令不行是無君也故明君慎令 一言正天下定一言倚天下靡

君必有明法正義若懸權衡以稱輕重所以一羣臣也 堯之治

也善明法察令而已聖君任法而不任智任數而不任說黃帝之

治天下置法而不變使民安泰 昔七十九代之君法制不一號

令不同然而俱王天下何也必當國富而粟多也 四海之內六合

之間誰貴曰貴土土食之本也 如妻不難破家亂臣不難破國

一妻擅夫衆妻皆亂一臣專君衆臣皆蔽 智均不相使力均不

相勝鼓不預五音而爲五音主 百世有聖人猶隨踵千里有賢

者是比肩

按申子書已亡諸書所引僅此故附錄之



韓策三篇

漢書藝文志春秋家戰國策三十三篇記春秋後注韓策三篇隋  
經籍志雜史三十四卷劉向錄二十一卷高誘注漢初得之蓋戰  
國游士記其策謀唐志三十一卷高誘注延篤論一卷司馬遷傳  
采戰國策索隱高誘云六國時縱橫之說也一曰短長書亦曰國  
事劉向撰爲三十三篇名曰戰國策非遷時已名劉向校書錄敘  
所校中戰國策書莒又有國別者八篇臣向因國別者畧以時次  
之分別不以序者以相補除復重得三十三篇中書本號或曰國  
策或曰國事或曰短長或曰事語或曰長書或曰修書史通其篇  
有東西二周秦齊燕楚三晉宋衛中山合十二國郡齋讀書志劉

向校定東西周各一秦五齊六楚趙魏各四韓燕各三宋衛中山各一舊有五號向以爲皆戰國時游士策謀改今名其事則上繼春秋下訖楚漢之起凡二百四十五年

黃帝泰素二十篇

漢書藝文志六國時韓諸公子所作師古曰劉向別錄云或言韓諸公孫之所作也言陰陽五行以爲黃帝之道也故曰泰素崇文書目黃帝泰素二卷

杜文公五篇

漢書藝文志六國時韓人所作顏師古曰劉向別傳云杜文公韓人也



韓子 韓非撰

漢書藝文志韓子五十五篇史記韓非傳非喜刑名法術之學而其歸本於黃老作孤憤五蠹內外儲說林說難十餘萬言注新序曰申子書號曰術商鞅書號曰法皆曰刑名東萊呂氏曰太史公謂非喜刑名法術之學則兼治之也索隱按韓子書有解老喻老二篇是亦崇黃老之學也今本二十卷五十六篇沙隨程氏曰非書有存韓篇故李斯言非終爲韓不爲秦也後人誤以范雎書廁于其書之間乃有舉韓之論通鑑謂非欲覆宗國則非也郡齋讀書志韓子二十卷跋云右韓非撰非韓諸公子喜刑名法術以富國彊兵法制之策于韓王不用作孤憤五蠹說林說難十餘萬言

秦王見書嘆曰得此人與之游死不怕急攻韓得非後用李斯之  
毀下吏治赦之不及焦竑經籍志韓非子二十卷李瓚注

張良韓信序次兵法

高帝紀韓信申軍法李靖曰張良所學六韜三畧是也韓信所學  
穰苴孫武是也然大體不出三門四種而已

幽憂子 唐盧照隣撰

唐詩人傳照隣病去官隱具茨山下手足攣廢乃著幽憂子十卷  
自以當高宗時尚吏已獨儒武后尚法已獨黃老后封嵩山聘賢  
士已已廢著五悲文今在集中嘗自號幽憂子

按照隣本屬流寓以寓居此地所著

之書故附錄之其本集二  
十卷不錄下具茨集同



徐秋卿集 唐徐商撰

焦竑經籍志徐商集四卷全唐詩止載七律一首七言一句律詩見藝文志句云萍聚只因今日浪荻斜都爲夜來風

徐彥若集 徐商子

全唐詩話徐彥若集一卷失傳止有戲答成汭詩二句見雜志

南泉禪師語錄二卷 唐釋普願著

東里集 宋楊樸撰

宋詩紀事樸字契元少與畢士安同學士安薦之太宗以布衣召見賦莎衣詩辭官而歸有東里集焦竑經籍志東里集一卷

餘詳雜志

畢文簡集 宋畢士安撰

宋史本傳文集三十卷

畢仲衍中書備對集

宋史畢士安傳仲衍士安子以祕閣校理同知太常禮院爲官制局檢討官制文字千萬計區別分類損益刪補皆曲盡其當凡從中問其事必須仲衍然後報他人不知也撰中書備對三十卷

西臺集 宋畢仲游撰

宋詩紀事畢仲游字公叔士安子第進士元祐初召試學士院擢爲第一除集賢校理歷職方司勳員外郎京南淮南轉運副使以黨籍終于西京留臺有西臺集全芳備祖畢仲游有絕句一首爲人傳誦詩云水痕天影淡相宜露坐秋涼乍快時桐葉芭蕉最多



事曉昏風雨報人知

李又幾文集 宋李及撰

焦竑經籍志 李又幾文集十六卷

具茨集 宋晁冲之撰

晁公武郡齋讀書志云先君子詩集三卷呂本中以爲江西宗派  
會慥亦稱公早受知陳無已從兄以道嘗謂公宗族中最才華喻  
汝礪序之吳之振云具茨集淵渟雅亮筆有餘閒未肯退下一格  
劉後村稱其意度容濶氣力寬餘一洗詩人窮餓酸辛之態

邵罔卿集唐詩二卷 明邵進著

鳳溪遺稿 明高尚賢撰

春秋正旨 明高拱撰

明史藝文志高拱春秋正旨一卷自序莫大乎君臣之義而天子天下之大君也莫大乎聖人之道而孔子天下之至聖也則尊王之義宜無如孔子者是故懼亂賊之有作而春秋作焉以植天經以扶人紀正所以尊王也而後儒不察以爲孔子託南面之權以賞罰天下其說旣成乃沿襲至今無復能辨之者遂使冠履倒置大義淪亡曲議橫流大道晦蝕抑又可懼也已然此何所始哉孟子云春秋天子之事也孔子曰知我者其惟春秋乎罪我者其惟春秋乎夫天子之事云者謂其明文武之憲章率諸侯以尊周室非謂其假天子之權也知我者謂我尊周也罪我者文武之法明



則僭亂之罪著諸侯惡其害已也如此乎而後亂臣賊子懼也其  
言固在其理自明而乃謂孔子自爲天子命德討罪以是知之亦  
以是罪之其亦誤矣予昔也讀諸家之說實有不能安於心者旣  
乃以吾心君臣之義而逆孟子稱述之旨遂有以得其大意顧方  
從宦徒懷之數十年莫能筆之書也歲壬申歸田之暇乃稍爲之  
敘其理以正君臣之義以明聖人之道以償夙志嗟乎春秋果假  
天子之權卽孔子之書吾不敢謂然也而況出於後人之誤乎謂  
春秋假天子之權卽孟子之言吾不敢謂然也而況出於後人之  
誤乎尊王也而與竊柄同則竊柄者何誅明法也而與干紀同則  
干紀者何責茲實萬古綱常攸繫予豈好辯哉予不得已也

獻忱集五卷

明高拱撰

明史藝文志高拱獻忱集五卷自序國制聖旦暨元日長至皆稱賀然惟藩國留曹暨外寮五品上者具疏亦皆頒示定式無異同也若廷臣則賀若謝皆無疏近歲章奏寢盛其在今則節賀無竢言凡有瑞應必禮卿首請疏賀而諸司從之其大寮遷官暨有遣有賜皆疏謝而小臣亦間有焉可謂極盛矣予自遷國子歷詹府南宮皆視篆賀必草疏乃侍郎係御除當謝尚書大學士皆例當辭謝且叨恩隆渥遣賚爲多故謝疏亦種種間乃次第成帙名獻忱集藏笥中夫文以事興事由時異斯集也庸紀時事云爾駢四儷六文云乎哉



日進直講五卷

明高拱撰

自序嘉靖壬子秋八月十又九日裕王殿下出閣講讀上命翰林編修拱暨檢討陳氏允講讀官拱說四書陳說書經既又有諭先學庸語孟而後及經於是乃分說四書故事藩邸說書如日講例先訓字義後敷大義而止然殿下聰明特達孜孜嚮學雖寒暑罔輟拱乃於所說書中凡有關於君德治道風俗人才邪正是非得失之際必多衍數言仰圖感悟雖出恒格亦芹曝之心也歲久積藁頗多庚申拱既遷國子祭酒乃乘暇次序成帙夫拱誠寡昧其說固荒陋也然非睿學克懋則荒陋之說何以自效故特存之用志日進之功云爾敢謂有所裨益乎哉

四書問辨錄十卷

明高拱撰

自序孔子之道如天地之廣大而其爲用如元氣流行於四時不可以迹求也乃其實則離乎日用之間而自極乎天德之妙故曰下學而上達知我者其天乎噫允若是果孰能知之信惟天而已矣後世學鮮融洽成心未化各持臆說以符聖軌既存執着卒落方隅是故聖人之心虛乃爲塞之而使實聖人之氣平乃爲激之而使昂聖人之機圓乃爲窒之而使拘聖人之語明乃爲難之而使晦子云書不盡言言不盡意夫使卽得其書猶未得於言也卽得其言猶未得於意也而况於所謂書所謂言者亦尚未之得乎故於聖人之意遠矣予本謫陋學道有年始襲舊聞有枯心識既



乃及除繁雜返邇本原屏黜偏陂虛觀微旨驗之以行事研之以  
深思潛心既久恍如有獲然後聖人公正淵宏之體會通變化之  
神稍得窺其景象則益信夫不可迹求也已問與同志商榷遺言  
冀正其詮乃不敢膠守後儒之轍昔仲舒欲罷去諸家獨宗孔氏  
予以爲宗孔氏者非必一致亦有諸家雖皆講明正學乃各互有  
離合其上焉者或可與適道或可與立而固未可與權不能得聖  
人之大君子於是叅伍而取節焉可矣固焉安焉錮其神悟非善  
學孔子者也錄凡十卷皆問辨之辭故名問辨云

南宮奏牘二卷 明高拱撰

自序予視篆南宮未久奏牘無多然一二有關處分者皆自屬草

故特存之事理所在後或有稽云

外制集一卷 明高拱撰

自序昔嘉靖乙巳春我世宗肅皇帝札諭輔臣令於翰林官中簡五六人或四三人備樞莞之用意至沃也於時輔臣舉編修二人檢討三人於中秘撰理文官誥勅曰以備用云而拱實在列先是典誥勅者或以閣學或以詹翰長貳其事既重而其文亦皆簡實無朱代言之體後乃屬之胥房供事官其事既輕而爲文者又率徇情浮濫所謂以萬乘之尊與匹夫之賤者實有焉而失體亦甚矣至是始選翰林之舊則其事復重予乃一滌陋習特追簡實且就其所司各加戒勉以仰副朝廷訓迪百官之意非敢遂謂得體



也積稿頗多歲久不復見歸田之暇偶於書笥中得數紙旋復檢索則散失者多十存一二而已因憶先皇簡微臣于廿年之前而卒大用於廿年之後其期待之隆蓋非一日爲嗚咽久之遂以逸藁錄而藏之家庸志弔湖之感思抑以存鑾坡之故事云爾

綸扉外稿一卷 明高拱撰

自序隆慶己巳蜡月有命召拱還閣兼掌銓務辭弗獲乃以庚午二月三日陛見履任自是諸所當行悉自屬草奏行之其在銓部者別有集其在內閣有關機密人不與知者不敢以洩至言外事暨辭免諸疏則人皆見之矣故特存焉曰綸扉外稿云

玉堂公草一卷 明高拱撰

焦竑經籍志玉堂公草十二卷

掌銓題稿三十四卷 明高拱撰

百序予攝銓且二稔餘諸所敷陳題覆悉自屬草非謂人莫可代也予每舉事必思國體所在求可卽一訓百者務爲君父正紀綱明憲度進忠直黜欺邪草虛浮覈真實蓋意之所注頗深恐人不喻吾意故須自爲耳積藁頗多間乃擇其事理重大暨自所興革議處者仍去其繁特存其畧全文一二而已爰彙成書用徵故實嗟乎恩非不可結其如害公怨非不可遠其如虧法苟有益於國則嫌何足避苟無益於國則名何足圖庸攄靖直之衷冀效涓塵之報云爾知我罪我誠何暇計哉



本語六卷

明高拱撰

自序予嘗有言曰天理不外於人情然聖人以人情爲天理而後  
儒遠人情以爲天理是故聖學湮聖化窒夫事有本情而人有本  
心出吾本心以發事之本情則議道而道不睽作之於事可推四  
海而準通千古而不謬何者天理人情固如是也故曰君子中庸  
又曰和夫中也者言乎其當也庸也者言乎其平也和也者言乎  
其順也皆本人情不遠人以爲道作本語焦竑經籍志本語六卷

政府書答二卷 明高拱撰



焦竑經籍志政府書答四卷

高文襄文集四卷 明高拱撰

明史藝文志高拱文集四十四卷新野馬之駿作序序載藝文志

按文襄文集諸板明末兵燹失傳康熙二十八年其族孫邑庠生高有聞購田五百畝重刻之現存文集四卷與藝文志中不符蓋明史或據舊刻或統諸奏牘而言也文集之外尚有程士集四卷文襄於嘉靖戊午主順天鄉試乙丑典會試所著程士之文至病榻遺言二卷則自紀顧命事及歸政之由並附刻集中

景淮堂集 明秦毓秀著

四六彙編講義 明劉承源著

晰疑操存解 明高務滋著

庭訓彙集二卷 國朝劉楨著

閑先堂集 國朝張光祖著

〔本傳〕廣曾稿一卷會稽章貞序見藝文志外有見山草勸學書統  
曰閑先堂集

存遺詩集一卷 國朝高緒之著

尉氏門人靳標嵩序

晚窻詩集二卷 國朝王九式著

懶餘詩集 國朝張信著

〔本傳〕覆瓿集十卷懶餘集十二卷  
按信所著詩集甚多未曾付梓今僅存懶餘集六卷而已

片刻餘閒集二卷 國朝劉靖著

〔夏邑彭樹葵序〕珠淵百仞腰絙而莫探其源玉府千間履絳而誰



登輿陟旃檀之寸香已渺吉光之片羽奚求又況竹使符旁書埋  
造化之窟綠莎廳裏函藏經史之根乍刺促而難尋詞林案牘或  
倥偬而失億心寄繇絲叢殘孰付奚囊蹕蹕應懸高閣然而自公  
之暇大雅有懷却掃追徐子之踪隨筆倣洪家之樣何必下帷三  
載始號搯觚寧如作賦十年才能成弓我友劉子原圃汎流佛地  
光照藜仙標正禮于二龍占建安之七子文成綺歲旣鶚薦而鴻  
騫績著華年早錦明而花艷非臨風坐嘯兼無意於蒲鞭亦燕寢  
凝香頻挾菁於庫露時則清談樓上捉犀柄以鈎元靜聽籬邊倚  
繩牀而忘倦校烏焉於蠹簡仗虎僕爲針砭豈於芸編驅龍賓以  
炙述祖德則芳飛空谷敘先賢則誼薄重霄倘有勸懲無妨等諸

笑牒如其典麗卽堪列以言鯖且夫披薜荔於幔亭劈滄波於鹿耳玉函金蛻大有奇情蠻雨猺花偏多逸趣嗤伽藍之陋記斤桂海之虞衡地近燕臺掣筑而心寒烟水雲連紫塞鳴笳而氣拂層峰攄彼行間吟咏皆成絕調譜來紙上低徊輒起遐思此燈炮酒闌所以暢搜羅之旨而電光駒隙遂乃成鈔撮之功也嗟乎人能好學豈限三餘生善偷閒何消半日九遷官而心遊竹素一彈指而界轉陶輪借甌還瓠休沐依然汲古屬草易草光陰不放虛時千狐之腋集而爲裘百卉之花醖斯成蜜非說之鈴也其類之苑乎蓋南部烟花每嫌其綺靡卽元和朋黨或過於嘲訕事旣未純義無所取豈若淵源乎世說鼓吹夫幽閭足驚趙鞅之魂能瞬安



豐之眼也哉爰承謹諉竊比揄揚展翠帙而沉吟啟瑤緘而考訂  
一言爲弁敢云元晏之高名千里傳書固是劉公之嘉話

宦餘錄二卷 國朝劉靖著

德州宋弼序見藝文志

閩行日誌一卷 國朝劉靖著

高密胡星序

滇南歸途誌一卷 國朝劉靖著

五音相轉譜 國朝邵瑗著

唐詩索隱 國朝蘇瑞榴著

風嵐講義十二卷 國朝白士宏著



松川講義十卷 國朝李晉著

衣德堂詩集 國朝白昭著

麈尾餘談四卷 國朝蘇如濤著

新鄭縣志卷之三十終



